

溥

熙

豪

溥熙豪

淳熙稿卷五

宋

趙

蕃

撰

七言古詩

永豐令括蒼章君尉上蔡謝君以淳熙改元二月
晦日勸農於負郭祖印院事已率蕃爲汎舟之役
前村後村桃李空牡丹醪醑當春風令君無暇問許事
親率僚吏行勸農清晨小隊東郊出宿雨初開泥尚濕
白頭扶杖稚子傍不待符移自相集令君盛服臨致言
國因肆赦新改元雍熙淳化太宗年治道度越唐漢前

爾曹何幸生此世身不知兵無橫稅去秋小歉未足云
詔書屢下憂勤意吏令奉行敢不躬爾毋自惰愆爾功
吾言諄諄爾其聽酒肉更戴君恩豐我時佇立觀盛舉
徑欲備用買牛具不然枵腹亦以寬年登賤糴夫何慮
少焉有白官盍休攜我山陰上小舟謂我聊此半日留
與民同樂非宴遊

四月十二日以夏潦暴甚艤舟辰之鐵槍崖下偶
得浮木於水中宛然如山因其形似名曰卧嶺立
峯喜而賦詩當寄交友之能詩者求著語焉

昔讀梅蘇木山詩未信人間有此奇雖云尤物不必有
時一玩之何病爲吾行東南千萬里僊游不已遂臻此
奇奇怪怪日在眼浩浩湯湯夜盈耳舊評峽江似嚴陵
此行佳處亦可朋又聞八桂好山水亦應與此相雲仍
畫師好手不可遇詩中有畫無其具江神好事不我尤
乞與一山酬願素不知何年遭仆落浪激波衝幾颺泊
岸高壁立自嶄巖泓淺坳深非斧鑿老夫得之喜莫極
欲加名字相刻畫臥之成嶺立成峯天成故爾非人力
多言譏譏欲何如夢覓新詩爲寫摹余名敢與昔人並

用寄我友梅蘇徒

八月二十四日同審知登塔山用審知前載九日

留題之韻作二首

時彥博歸及常山

郊原莽莽吹黃埃餘暑已去苦復來昨宵一雨爲蘇洗
曉興坐覺飛崔嵬平生詩盟有徐孺筆力可挽狂瀾回
要明兩眼費雙脚作計似我何疎哉茲遊只欠王子在
見說歸書一紙開追隨正復聽君樂流浪如我空增哀
吾邦此山頗高絕泛菊况堪臨季月要當相與一杯酒
只恐因之又成別

出門生憎觸風埃故邀幽人山中來小休危亭帶曲折
未盡高塔當崔嵬目營所到豈有極脚力尚壯不擬回
舊遊久闊空信耳高處一上何任哉是山百年定誰主
一邱新壤手所開淵明自祭豈非達杜牧作誌夫何哀
如君風流固曠絕與我論交忘歲月異時訪我入此山
扣牛共唱生生別

明日同數公復登山忽聞履聲乃審知也攜和詩

三篇來復用韻作一首

松間稷謾衝浮埃登然誰能爲余來憑高所歷故已下

得君更覺爭崔嵬茲山不到近十載頻日能來已再回
人生萬事每如此而欲取必真愚哉袖銜文書辱持似
快讀不待紙尾開金聲詎須擲地出隱隱自雜山風哀
吾曹用意果癡絕非爾何以娛歲月明當舉似子王子
不但慰歸仍賦別

貴溪隔岸有二巖僕舊遊也聞子暢受秋租于彼
以詩寄之

黃巖嶄絕人人居徐巖蟠鬱處士廬扁舟半載泊南岸
折梅看雪頻携壺黃巖夾道松百株風來迎送齊笙竽

壇崩殿古黃冠癯懸巖石刻墨可模徐巖觸目多荒蕪
啼嘯往往紛鼙鼙廢基斷砌或有無名字不復知誰渠
聞君奉檄方受相播糠眯目莫與娛作詩爲君道何如
尋幽速遣從騎驅賦成孰寄當念吾不用寒溫枉素書

次韻斯遠同宿歲寒西軒

思君無計憂能舒見君還愧腹每虛知君於此未見止
而我但覺有不如他人招呼厭來集爲我淹留成屢屈
豈惟高義篤交情政賴微言起衰疾南山三刹此最高
平生幾許乎逍遙異時我去君獨遨期當寄我山中謠

謁孺子祠由南昌還熾舟之地

南昌假傳欲上書孺子乃復辭聘車東都已顛不可救
莽篡未露猶枝梧福爲市卒終潛吳穉乃懸榻太守居
嗟哉跡異心不殊出處語默如是夫

呈齊之二首

舍舟步到南山寺恍然忽記當年事李侯見我顏色温
席間款語真有味翰林風月久蕪沒莫歎青衫百僚底
君不見少陵一生窮到死亦有詩能驅瘧鬼

南山清隱寺僕兒時

嘗游焉

夜聞袁宏誦詩聲空山寂寞魚龍驚丈夫有才不貧賤
倦游何乃困長卿平生讀書得力處公卿褐夫安重輕
鴻鵠一飛定千里俯首莫與燕雀爭

主山湖圍二渡

主山渡頭成久立長年傲客呼從疾撐舟來前僅如掌
泝波却下幾百尺湖圍橋壞新有船衆壑奔流會一川
嗟我胡爲數此險爭似飯餘牛背眠

約明叔過買江天閣

前年爲君記江閣醉裏狂言不知忤豈惟大負退之慙

要似楊雄真悔作君家此閣端何然萬里長江咫尺山
江流湛湛山平遠合付畫手非詩傳畫工縱得空諸境
閣中之人妙難領世人紛紛夔虻蛇是公了了形神影
白鷺洲詞寄曾裘甫曾時在鄂
白鷺洲前煙草微黃鶴樓外煙雲飛縹縹黃鶴政高舉
漾漾白鷺孤無依鶴舉直上登寥廓鷺立汀洲方俯啄
卒然驚墮野人豈不欲飛遭急縛

示兒

我昔讀書夜達晨膏燭且盡繼以薪年來漸知得力處

簞瓢陋巷忘其貧爾曹有身須自立幸逃薪水供朝夕
不於文學自勤苦長大始悔終何益

十八日記夢

冥冥落月子規哭幽人夢成績復續茅簷壞砌到何許
醪醑架倒留紫竹紫竹新抽雨又滋淚粉娟娟凝翠玉
夢中自省非宿遊又意簷村舊林谷阿連對床呼得醒
亦說夢作看花行看花夢向江南去江石犖确屐有聲
行逢古屋鬱崢嶸僊家釋氏俱莫名看花非揚亦非洛
但見滿眼灼灼朝霞明夢中又意東莊路普圓寺下英

海國和 卷三
蓉樹主人亦道舊相識乃復不逢戶外屢嗟我與君無
自疑夜之所夢晝所爲扁舟若具可徑歸短長不必詢
筮龜

別韓尚書

南山之作險以壯南溪之作閒以放流風莫和况當家
南澗先生堪頡頏吾州自昔寡所傳一自南渡屨羣賢
邇來寂寞誰嗣焉先生築屋南山邊先生事業本廊廟
履聲夙已光明到闔廬固非避寒暑大厦萬間均覆幬
我家爲庶爲清門早因昭德容攀援自期松柏歲寒後

不入桃李春風園鄉者屢見不一見何但懷刺亦行卷
胡爲於此不繼來衣食遑遑游苦倦扁舟去矣江復湖
可能不一趨庭隅吹噓上天不敢望贈言於此能無乎

送徐季益赴婺州陳尚書之招并屬寄謝郡守韓

侍郎

禪月臺邊草樹蒼下臨溪流碧泱泱君卜居之歲且長
徑路不忍夷其荒我時巾幅上君堂勞君煮茶炷爐香
與談世故如有亡掉頭誦詩聲送衆別來書劄闕寄將
忽然貽我細作行似言欲從懷土旁迺邈遠趣金華裝

金華尚書漢豫章招禮孺子固所當出處有道君素詳
此行甚重無或傷况君袖手久退藏九十半百胡可忘
儻謁地主詢吾鄉為致登臨憶侍郎

寄新喻丞章季亨

憶昨寄聲因鮑子闕然已復四路星向來相期臺閣者
薄宦乃淹松竹廳頗願近詩見新述舊好尚意能忘形
臨風三歎不知罷梅花落盡蘭未馨

送王亢宗赴劔浦丞

青松自是山林物移植堦除傲難屈雜居篳楚塵埃地

譬似高人累簪紱孰能哦咏於其下古今僅有一斯立
昌黎老翁為之記遂使崔名等金石王郎家世本愛竹
舊說不可無一日要將我竹配渠松聊復從容寄卑秩
春風咫尺龍蛇動除地求栽政宜疾為銘耘業定誰歟
是公筆力韓之敵

李袁州嘗為君
作耘業齋銘

送程隄幹宏靖

尚書曾剖上饒符我姊亦歸高郵掾與公既親亦有故
此地經行幾相見十年幕府持旌麾日月計之無乃遲
治世急才寧定制後公把節慰民思

送丁懷忠朝佐赴象州教授二首

西山南浦昔相逢桂林象郡今相送長才妙略世所知
諸公貴人胡不用文風廣被固可喜志士遠適豈其理
上書報罷君勿悲廣西政復多事宜
我今方從湖外歸君行重向湖外去湖南山水故佳絕
我獨茫茫畏長路君行更過五嶺南象郡我亦聞人說
縱令爲郡真爾好願勿久留歸要早

留別子肅

欲雪不雪雲雨愁將行未行心口謀問胡不去良有由

故人伏枕關我憂自心初識十年遊不作世人新白頭
抱關非爲辭挾搜乃知自欲吾志求適來遂作兼旬留
昔者公疾今日瘳河山空能泣楚囚不如忽几問不休
公如大道鳴驂騮我乃蹇足歷澗溝彌明故足悲侯劉
淙淙詎識東之流懷哉黃堰公先疇章泉吾亦營蕪裘
莫言相望風馬牛葦間會有延緣舟

審知以詩送行借韻留別

十年保我章泉竹木枕布衾供易粟家貧縱爾不自給
且不知榮安取辱今年誰令起作官此路向來非所熟

示詩往往道離索又說是邦山水足風流文物夙有人
九州共識黃山谷細哦海內流傳句足緩司空城旦讀
少時已無鞍馬志老矣豈堪消髀肉但令詩與故人期
此外聲名甘碌碌

又

誰云徐郎瘦如竹撐腸書若相如粟渠儂高處背時俗
而獨許我遊與辱舊來詩已有老氣邇日更覺加圓熟
我生取友固不苟乃復得君真厭足清朝求士正側席
可使白駒詠空谷期君布衣應徵書未見却從東觀讀

我今作官竟何事亟拜未應徒鼎肉與民憂樂安得同
所念因人終碌碌

又

秋風泠然動高竹起並朝簷溫體粟忽驚剝啄意誰何
乃是和詩重拜辱再三開闔手不置不惟詩好字亦熟
我雖年事濫催忝于此論功真未足重憐別來不我舍
連日追隨訪林谷和詩未厭數還往別後要期常誦讀
知音已死或絕絃聞韶解忘三月肉但得我輩識錚錚
徒使世人譏碌碌

季奕枉詩送行借審知韻奉別并呈伯元

往年敵來如破竹九州泛若浮海粟鄭公仗節守馮翊
毅然可殺不可辱飄流南浮適茲里平生行事耳目熟
幾回下馬過其墳溪水洄洄抱山足季孫甚才恥爲吏
哦詩欲效雲臺谷四篇贈我勞我行入手爲之三過讀
君家涇縣亦工此知者尚稀凡眼肉會看入洛似機雲
不應如我但碌碌

孝顯追送至沙溪書所見以別

白雲英英行空山白鷺矯矯去復還雨聲驟來却小住

樹色全綠或半殷誰家有屋茅三間春聲未斷橫炊烟
刈禾雖阻得治圃造物所惠無一偏我亦願此坐無田
千里顧上西江船經年擾子曾未厭更煩車馬相追牽
客中無酒可醉子聊書所見爲別言

成父來自玉山審知有送行詩且以見及次韻

思君一夕或三起詩卷何從來眼裏驟疑笑語接秋窗
不悟江山隔吾里近來海內詩好誰賤目可憐空貴耳
謫仙旣作東山稱杜陵亦貴衡陽紙吾人得窮固其分
幽谷安能爭市倚何當與子棄茲世卜居在在佳山水

海原種 卷五
不同淵明田下澗卽効龜蒙耕甫里文成不作封禪詞
相我于耜并舉趾

次韻徐運使送行

歸耕負郭家無牛手持釣竿何適投長年慘慘集百憂
土牛未肯隨獼猴秋風別家月未鉤彈缺永歎客五侯
吳江楓落曾四愁行行重到江東州誰能著意憐轉流
新詩忽俾吟掉頭念將小駐蹇莫留冰霜豈不思摧朝
山川回首空相繆

再次韻審知索彥博送行之作

江清可釣思持竹地廣可耕思種粟胡爲作計久低回
而乃覓官親賤辱南州徐孺晚與遊江東文度昔所熟
堂堂荊州止獲一人半我邦有此二士差亦足五君流
詠轉竹林蘭亭何意慕金谷徐詩到眼以數過王筆入
手曾未讀但能贈我以規不以頌不用崇酒仍載肉嗟
哉他人豈無言交友不高徒碌碌

寄劉叔驥兼索遠齋伯瑞仲文叔魚和叔太和送

行詩

若溪往來非不款何山道場况非遠如何著脚竟無緣

孤我平生看山眼劉郎生長在溪山吸光飲綠歲月閒
不惟人作晉宋樣更覺詩叅簡遠間向來稍得相酬唱
別後闕然難屢枉况今結束事西浮那可無詩道遐想
遠齋視我猶其子伯仲視我乃其季儻能俱寄絕妙辭
更約髯叅并表弟

寄楊溥子

昔聞許劭月旦評人生倚以分重輕當時初非徇虛名
往往夷考其學行今人誰復持此柄鄉評亦復無公論
故當信目不信耳毀譽不用從人問我行溧陽得楊子

何止國士天下士大科異等非謾狂筆頭真有三萬字
十篇琅琅金玉音一唱三歎感我心子昂感遇不啻過
阮藉詠懷何念深匡章通國稱不孝夫子與遊仍禮貌
雖然前聖亦有云善與不善分惡好

文顯和答旦字韻詩再用前韻寄文顯

憶昔追隨昏復旦負郭雖賒足忘倦別之未覺夢魂踈
但恨有時音信斷世間變化何不有深谷寧須問高岸
我今瘦骨立如山君亦童頭不能亂君不見簞瓢自樂
保清名富貴失時多遠竄千年青史固茫茫精意所關

海原種
惟此段

達觀僧紹本年九十能記東坡建中靖國題詩之
事且云清都道士者坡同遊此寺坡題詩後道士
臨之而滅其迹爲賦詩記此

老僧長生元祐年龐眉皓首高頰顴紛然送迎過雲煙
解記南歸玉局仙清都道士同蹠蹶詩成忽俾如蛻蟬
嗟哉用心故可憐那知海內爭流傳

鑑山主以天聖宣賜行道者五百金裝羅漢青龕
香爐爲示復用韻

高林杲杲日欲出却視諸山雲自入道人導我啓圓龕
五百金仙爭突兀耀州燒蕤樸不巧獅子座中蓮葉繞
亂餘得此鎮山靈莫恨當時賜田少世人變滅隨空雲
至人來往繇念根長眉下生會有辰摩抄笑視默與論

寄婺州喻良能叔奇

我家入婺四十里有竹叅天山峒起尋常一過故人飯
長是驅車不停軌去年偶爲逃暑留禪房小憇清溪頭
君當適閩駐行李遣騎問我安與不我聞君來固驚喜
君亦怪我窮不死殷勤竟辱懷刺先我乃踉蹌成倒屣

相看問我今何如爲言斑鬢甘泥塗君時新有阿兄戚
語及往事猶長吁君歸匆匆莫可挽劇談未了風吹斷
贈君不直一錢詩何以報之錦繡段

蕃以詩送君君以
所著二碑見答

明朝過君君且行我思重別難爲情勞君下馬更握手
再三謂我頻寄聲別來僅可熟羊腍含薰待春蘭已發
擬將採掇慰離居路遠何繇直君側如君人才誰與儔
直諒豈下西京劉校讎祕府自能事何乃傳經瀕海州
吾君急賢每肝食詔書取士到微仄君今未免滯周南
諸公貴人曷逃責願君覓句勿自哀清尊無事日日開

未有白地光明錦川作人間負販材

到家寄季承二首

相逢到別二十日披覽溪山駐行役淒涼浩蕩兩生境
意不求詩詩自得臨分不作珍重語顧欲倡酬詩卷覓
問君得此君何用云比相如家四壁杜陵囊帛解救寒
陸生越橐千金直人言君侯真太癡君癡不癡君自識
向來已念脩途苦還家作况初無愈嬌兒失乳索飯啼
病妻服藥思鹿脯關心藥裏詩自廢無復吟哦繼朝暮
與君定交且十年相從未有如君許信知此樂莫可常

後會驚心念風雨報儂安否比何如莫以素書慵不具
寄子暢文顯兼問僉判丈起居

昨憶長歌與君屬嗟爾明月悲黃菊問君得歸今幾日
我迺還家則未卜人生會不可常何止有類參由商
月明固可共清影菊開安得同幽香安興歷想來自越
賀以羊酒生暖熱小人繆忝通家子不獲親臨上壽列
羨君斑衣有餘歡憐我緼袍無乃單何當卒歲從周子
陋巷簞瓢忘餒寒

以歸來後與斯遠倡酬詩卷寄辛卿

人家餽歲何所為紛紛酒肉相携持我曹餽歲復何有
酬倡之詩十餘首緘封寄藁元英方從人笑癡我自狂
狂餘更欲誰送似咫尺知音稼軒是公乎比復何所作
想亦高吟動清酌賓朋雜選孰為佳咸推楊范工詞華
我曹所樂雖小技歷古更今不能廢歲云暮矣勿歎窮
梅花爛漫行春風

寄莫萬安

天生尤物為民瘼荔枝奔騰自南海後來始說閩部茶
亦有風人刺丁蔡嗟哉萬安十室邑橘比江陵梨號蜜

嘗聞舊日事包直千數私家公百十莫侯爲今知其然
罷獻初從使者先其餘詬病置不問貧友或乞捐餐錢
憶昨追隨秋政熱不但近公如玉雪別來已忽露爲霜
當念相如多病渴

送周守二首

昔我移官悼恐灘緘詩送公因阿連轉頭梅事兩飄忽
我亦解秩當返轅豈期邂逅客歸舍逢公政成朝日邊
可無一語道離闊顧待別後空闌干我聞袁人道路言
往者頗病吏道煩袁人徯公以爲治如亦子待父母安

問公治袁竟何如寬不至弛嚴不殘不惟民絕催科癡
吏亦不急惠文冠太平官府見今日珥筆舊俗略不存
簿書期會足閒暇江山風月忘遊盤作堂圃中視所尚
我所尊者房李韓東西日月雙跳丸後人思公面孱顏

尊德堂兩傍名晨
光夕照後名愛山

人言循吏治無迹有如春風被田園

試看一一發生意從千百數何繇論淳熙聖人歎才難
得人之路無不殫而於守今最注意往往六察并郎官
少公邇日與幾政仲氏力請得皖灑公雖遲登玉笋班
持節其惠寡與鰥未知除書落何地我家懷玉江東山

淳熙稿 卷五
勿言形迹暫云遠在處孰非千萬間

雨珠雨玉非襦粟雨

三雨字皆去聲

雨懸知勝珠玉去年病禱

祇如楚今歲應祈如撒菽黃雲割盡綠浪搖可實飢腸
慰枵腹微官但爲斗食謀再拜題詩謝賢牧

早過桃川不能謁一菴走筆寄之

山蒼蒼水茫茫落月未落歸故鄉扁舟欲繫忽已遠隱
居不見遙相望思君山中煮白石歎我道上炊黃梁開
書視古常太息今人高處亦難及

泊舟桃花臺入妙香院

攜家本避長城戍孫子相仍任桃塢雖云秦暴賦可逃
後乃開通晉南渡當時未有神仙傳創自淵明詩五言
祇今圖畫遍四海樓臺樹木空蒼然玄都亦說桃千樹
夢得飄零因怨句未應只屬羽人家亦有因茲悟初祖
我州那得桃花臺臺下清溪轉石哀仙耶釋耶不可見
每一過之空繫纜

晨起聞杜鵑

水聲嘈雜蛙聲小客子披衣坐侵曉平生嗜懶每貪眠
行李催人未渠了不勝倦歎歌方苦更聽林間杜鵑語

海原集 卷五
杜鵑我豈不知歸淵明政爲飢驅去

初六日絕湖

政爾喧豕浪如屋忽焉熨帖紋如縠大船雙櫓鳴鸛鷓
小艇孤橈亂鳧鷖金沙粲粲列宿明君山宛宛修眉綠
囊無東絹畫無工爲寫南征圖十幅

南風行十八日早作

吾聞黃帝張樂洞庭野始意莊生言故假又聞湘靈鼓
瑟進元螭亦意屈子夸厥辭屬行洞庭四月去南風三
日吹不斷黃昏猶是天陸離午夜忽成雲片段病夫數

起不知睡數起側聽仍熟視恍疑帝樂尚鏗鐃又謂湘
絃發幽闕乃知二子元非虛吾聞自用耳目拘須臾月
落天向曉依舊南風波浩渺

遊山谷寺贈住山欽老欽嗣愚邱詩

少小已誦山谷文老大始遊山谷寺按詩尋境盡可得
落筆不容追一字舊聞是老詩有宗韓門更許愚邱雄
風流前輩日已遠此道此山俱屬公

除夕萬安寄成父并示兒女

去年除夕遙憐汝今歲酒觴期對舉誰知人事苦好乖

百里相望竟成阻去年雖深兄弟思兒女抱負有母慈
今年已作生死隔慟哭無地天使之哀哉一官竟何直
南北由人長役役屬兒勿恨弟勿嗟來歲田廬當畢集
阻風新淦二首

昨日北風猶可行今日北風不可撐雖無人止公無渡
馮河而死聖不與况我生平憂患多平陸往往愁風波
近連章貢遠鄱蠡如此千濤萬浪何

北風不但江流白天色往往吹作陰漫云一水六千里
中有青山千萬尋人言下水必奔駛而獨於此成滯淫

鷓鴣屬玉爾自得短詠長歌吾亦任

投宿聖仙寮

有序

晚發楓橋期宿聖仙寮大風逆面至已二鼓叩
門甚久老黃冠方出迎館予於一室有釀存焉
未熟沽舊酒而飲

已慚叩戶驚莊夢更喜置牀鄰畢甕新醅未熟不可嘗
舊酒雖漓聊入用道人深居怕賓客老子頻年慣行役
細聽木杪風向息起視月沉天正黑

宿合龍山達觀寺用張澂達明壁間韻

遊山到處不擬出幾向官程問山入旁人笑我底悠悠
我亦應緣聊兀兀平生作詩忌大巧到此真成腸胃繞
試將閣筆罷褚生又病囊中此山少入山已破山中雲
出山定復松崖根合龍端為此得名達觀妙旨又莫論

博山道中

春陰春晴往復佳園花落去逢山花城中小駐欲十日
坐覺老眼孤芳華中團寺前慣休歇故向博山尋曲折
眼中奇處要使傳倚賴筆端真有舌

芙蓉道間二首

芙蓉山上芙蓉尖土人語向人咫尺分毫纖或如冠劍或
鳥獸令我左右煩窺覘平生退之南山句為渠特騁筆
力嚴那知刻畫果辦此造物至是無留殲

芙蓉山下芙蓉渡歷盡崔嵬何物路更觀溪水突人來
令我詩情雜欣懼輿夫重說松原山如此積雨應生湍
從來演漉無根源水收石露須臾間

辰陽待嶽祠之命舟發武陵回寄從游諸公

叔父風流元祐支清貧遠自相國時舊聞河朔人偉奇
元衡筆力猶可窺佳哉伯玉賢墳篋小阮亦與竹林期

兆民雖云非舊知知之正自梅花詩伯壽憔悴儒冠衣
十年不調長苦飢經明行修後所歸非吾光遠其誰推
洪文學問方築基基成可保無傾歎我誤落東南陲
踈者迺親親異宜念我流轉終年疲去章已上歸俟之
或持酒肴或贈辭亦或眷眷江之湄數面成親還語離
前日之樂今日悲秋風颯颯衣披披山長水遠屬玉飛
高城望斷日已西望不可見令人思

明叔有詩贈贛丞曾幼度次韻簡明叔并寄幼度
爲明叔賦買江天詩

詩成要落天地間太虛明月相往還聲名或覺四海隘
身乃憔悴窮閉關詩中妙理超生死何但不以彼易此
我來白下豈徒然簿書鳧鷖非吾事陳君一見投紵衣
刺天翼並青冥垂楚人不悞玉在璞山川終用駢之犁
曾侯願識今已後因君示我詩到手不惟我輩獨識真
異饌珍羞甘衆口幾思插翅飛墮前漫看璧月缺復圓
符移催來定不遠拏音不見聞擔肩世人千金買嬋娟
我視棄去如浮烟萬言杯水世所捐顧欲賴以無窮傳

次韻徐季純見貽

江原種
卷五
三
八渾孰愈千丈清幽居何以爭城傾翱翔蓬蒿豈不適
乃欲萬里勞蜚鳴文章縱云有定價瓦釜亦或能鏗錡
知音固當屬善聽我初未鼓一再行鄭人之璞周死鼠
昧者自謂懷連城我於翰墨雖早嗜四五十今何情
元無小異君孰取矻矻便欲揚其名得非念我西南征
倦遊久意思傭耕少年不飲老更醒而衆紛紛多絕纓
屬君勿用揚其名臃腫拳曲能全生

畢叔文攜坡帖及與季真給事倡酬詩卷見訪于
邢大聲家相與觀之明日次韻淳熙癸卯正月二

十有一日也

精金美玉當難朽白衣蒼狗終何有胡爲徑欲老東坡
應坐生時宿南斗何時斯文日再中共推元祐超羣公
衮衣已易深衣古醴酒寧思客酒濃當年政化方隨日
詔訪賢良設科十玉堂發策肆雄深四海旁招無遁逸
緬惟貞觀圖凌烟功臣劔佩空蹉然未如武德藏書府
至今名字星日懸君之曾祖我高祖想像聞風謂千古
書藏東里罔或存集喜西臺刊未覩相逢已足慰悲涼
墨妙更許窺家藏奇趣造異兩邢子置酒共親燈燭光

次韻斯遠同彥章見過之作

昔人結交談耳餘一朝變起肝腦塗吾曹結交自有道
嗜好又况子與余每憶見君吾里初中間去君落江湖
歸來忽忽夏復夏相過凡幾窮朝晡君家仲容亦吾徒
向來亦恨天一隅我今借屋得近市渠乃屏迹田間廬
吾曹與物自多忤頌讀詩書猶論古君才端可供王羞
而我不足供鼎俎胡爲愛我不棄我匪但追隨仍晤語
南山有約不可渝可堪舊雨連今雨

次韻徐審知寄贈古句

倦游歷落三載中重來觸事多不同舊交雲散隔山嶽
在者一二莫我從新知喜獲徐孺子年少已有諸老風
譬之寶劍雖尚仗清夜往往舒長虹惟君家學故有宗
念我早日嘗登龍周旋何止道疇昔玷缺便擬相繭縫
分攜轉眄且十日夢寐嘗若見德容要裁短章寄離濶
抒思苦窮無由豐新詩忽來墮我側句法沈穩字亦工
寂寥此道幾欲息立文縱在人非雄吾君嗜好乃如此
誰爲冀北真羣空我今百不一稱意顧賴交友忘終窮
茲焉得君益足賀自起酌酒澆塊胸滔滔原從濫觴至

君其勿憚尋尺庸異時相見定刮目敢作吳下舊阿蒙
因君我亦事樵蓑瘠鹵要使成千鍾

呈審知

去年別君重九日君時店作臥一室許我爲我一入山
人事好乖言竟食一官我落江之西每附書來必以詩
宣心寫妙無不盡知君不累寒與飢念君見君何由得
江西水深波浪濶無何奄忽室人喪繫舟復在南山側
君來見我顏色好不但文章能合道信知木潤山有輝
益背睅然眸子瞭向來之所未見書向我誦讀如貫珠

有時舉問不知對汗爲浹背口輒呿嗟我忝惟十年長
學業無功時旣往羨渠松柏拱把姿絕勝樗櫟高尋丈
一官羈我端何爲投劾歸來亦未遲豈惟問字當載酒
儻復借書仍一癡

呈葉懷寧陳參軍章簿公

潛山皖山煙雨昏山城索莫少所親令君邀我入山去
復道山流方四奔側聞剥啄來叩門疑匪索我云見存
已焉一見卽傾倒乃與諸劉相弟昆因君又來驚坐陳
吾嘗同僚義世敦不惟邂逅索詩卷更復追隨攜酒尊

呈任邕州詔子言

清江江上賢大夫我所識者向楊胡盤園近說在城郭
使君政剖邕州符笑談雖阻親顏色新詩往往流傳得
豈知舟楫復江湖飄飄又墮清江側向來一識苦無因
茲日何緣得造門要題詩句道所以行色蒼茫難具陳
盤園已成十年陰使君二毛殊未侵平生慷慨功名事
切勿戀此成還心

用韻呈碩父昆仲

嗟我失脚墮棘榛寸步有若千里行窮山自縛數椽屋

便認懷玉爲里門扁舟泛從吳楚轉遠遊欲賦慚無文
他鄉喜見兩表弟把臂勞苦仍如勤夜窻欵坐屢續燈
有酒更倒樽如岑祇今一笑莫輕失轉首便恐成後今
要知後會少何許慷慨忍對臨風襟故家如子未多有
立身行已須自欽不惟門戶在所寄異日亦足張吾軍
曾季明經過相見聞壽岡先生挂冠之報且承動
靜因其歸賦古句寄呈用坡谷贈王慶源韻

夫子文章何所如高處直命騷爲奴世人共誦詞人賦
不道雕蟲羞壯夫兒時聞公薊林社旣見則喜已白鬚

公亦與我自言志笑謂此客向來無昨傳得官隸王都

且復將試齊相壺岐江嚴湍浪饒舌

頃聞公除車輅院有寄公詩云嘗許

峽江上山水似嚴湍

愛公願公吾道扶今知謝事歸懸車食可無

肉寒須襦再三問公近起居復道今腴非昔癯君今好

去相與娛馬牛寧得加我呼絕代幽居在空谷市門三

五方當墟

戲呈喻叔丈

平生喻工部許我詩盟與邇來每見每怒忽倚賴深春

間歸路問我自行何所去告以吳門當小住問公公有

故人否為我略營薪水助欣然惠我書一紙為我殷勤

譚所以我云素書難送汝併復因之陳翫馘公言於我

則厚矣楓落吳江自為累幸逃烏有一先生猶勝東城

老居士

坐間呈曾幼度兼屬陳明叔

三年幾度江天閣我爾相看兩牢薄江山好處欲題詩

下筆逡巡媿吾弱詩中最愛曾韻丞恨渠不來俱此登

今晨驅車叩吾門寒温未了先覓君乃知吾人同臭味

識面聞風總相契一杯聊爾勞江山向來鬱鬱今開顏

留清江蒙簡兄壽玉徐兄思叔皆以文卷寵教愧
未有以謝又承壽玉枉示古句仍用鄙韻謹次韻
併呈二兄

客亭何以祛暑溽一時頓有此兩玉逃虛不用聽
醫俗何須更栽竹平生韋布困藍縷敢並奇文森綺縠
愛而忘醜反譽我惠以大篇仍短幅頗思浹日相就談
應對先生愧空腹奈何別棹復催去一日十日寒且暴
兩君如此尚場屋吞舟詎可尋常瀆悵子薄官亦碌碌
政坐家貧耕不足

二月晚得少空偶閱杜集無何墜火焚者數葉謹
成古句致愧惜之意呈明叔仲威

去年鼠齧涪翁文今年火攻少陵詩雖云成毀有定數
天意於此可逆知我之所嗜何足計上有先墨顏之姿
況渠詩本貫忠義在處神物宜護持向來一字且莫補
脫此千百何繇追我詩不工空自欺天意豈欲警戒之
不然身當貧到骨俱應蓄此瑰瑋詞又疑風來勸勤讀
邂逅俾之遭禍奇平生學易未有得損益二卦須湛思
詩成書以示我友不惟自訟仍求規

莫萬安生日

員多缺少銓曹病陛下用人多擇令公今秩滿代未除
召節盍來人側聽我知天意從民欲要煖袴襦飽餐粥
遂令局促滯騰驤百里孰如天下福我官白下未識公
謠俗往往聞其風坐移不作趨走怕政喜官曹退食同
我嘗從容聽公說勞心撫字催科拙昔人如此號循良
歎息今時異途懶雖然自有公論在民之所言上其採
舉觴不但祝長年始立新秋甘雨霈

送趙一叔江西漕赴召代成父作二首

憶昨公持使節西迎公曾渡石田溪今公復因召節至
送公亦渡石田水公今西來又東去送迎車馬紛無數
我雖憔悴不如人倚賴故情蘄一顧
阿兄今得太和官買舟同載初不難公持使節豫章郡
蘄以過公道窘寒公今召節趨日邊我雖失望猶欣然
西江恩波千萬里活此枯魚當易爾

臣馬啓泰恭校

淳熙稿卷六

七言古詩

正月二十四日雨霰交作

宋

趙

蕃

撰

杏花燒空紅欲然柳色亦復青可憐胡爲雨霰忽交作
 已洗破衾還被綿去冬梅時雪復雪未省好看冰玉潔
 祇今縱有已殘枝零落教人已愁絕故知好雨當趣耕
 快雨仍須作快晴放渠花柳十分事我欲浩蕩郊原行
 夜雨起書曾移忠示譜後

去年秋旱冬尤劇一雪不能濡土瘠立春日雨雖應時
到今闕然又幾日遊人但欣春物榮農夫痛心田未耕
我因于役偶適野駭見蓬勃煙埃生我今一官非勸農
爲民閔雨常顛顛如聞春寒雨之候病骨不憚添衣重
朝來數點初軟軟勢壓黃昏成霖霖雖云潤物要無聲
未救田疇龜背暴眼前市糴雖云賤復道輸租錢乏見
從來穀賤必傷農政亦何能堪此旱天公用意何難爲
三日爲霖事可知區區折腰困日糴苦憶村春宿雨時
屠龍先生曾夫子著書斤斤良有以往曾持獻儒林蘇

爲歌秧馬附書尾再係知我此書愛遺我殷勤意何在
世人菽麥或未分而翁有意除梯稗我今一官故不堪
此書歸出爲指南便當教兒罷羣讀讀此寧憂飯不足

偶題

空庭無人風自掃風定時聞有啼鳥簿書幸免苦束縛
文字何妨恣探討菊湯瀹茗雜鼠莫瓦鑪欲作風泠泠
睡魔於此不得靈簷前卧對山橫青

仲春望後二日作

入春不雨憂在田數朝乃復屬相連今晨得晴絕可喜

病體素羸猶著綿杏花始開忽已落桃李安能問今昨
獨餘楊柳故青青乃似仍叔之子弱春今二月已強半
忽忽何方爲羈絆雨雖未厭愁奈何又聽僕僕林鳩喚
社後一日風雨中作

南山北山雨未分東村西村雞叫羣病夫深居百不聞
香爐茗椀頻策勲浮生蹤跡空中雲斯須變化歸無垠
春風九十又足云眼中紅白徒紛紛

張王臣載酒約同過梁和仲旣以風雨大作舉杯
相屬而止偶成四韻呈和仲

祇疑寒食無風雨不料今晨頓如許縱然風雨敢怨尤
留得佳人駐南浦佳人雖駐亦何爲杯酒竟成孤晤語
巴陵他日記同曾君歎淹留我羈旅

懷斯遠兼示成父時兩逾月矣

巴陵一月雨不休豈惟人病天亦愁蠶飢麥腐穀種壞
農夫田婦呼天求巴邑有客方倦游杭湖欲歸思具舟
冥冥政爾羨歸雁拍拍安得從輕鷗遠書數月絕不得
爾窮故與吾髣髴或云此雨祇此域又道淋淫遍江國
夜來痛飲不知極終日破牀成兀兀感斯風雨憶江東

詩就鳥栖窻紙黑

雨

疾風吹倒庭前樹更有飛來雨如注終朝畏暑自脫巾
亟起收書不能履前山雲重如潑墨坐想溪流高數尺
是間無乃隔分龍點滴纔堪清几席前時小旱已作憂
三日爲霖遂不休早禾盡實晚禾秀造物於此功無留
祇今望霓尤所急百里之行半九十民乃奔走奉神祠
神盍經營足民食

時西山方朔東嶽祠基
今日之雨謂神告也

寄懷

風聲雨滴相騷屑深山深處應凝雪豐年未慮米如珠
病骨自安衣百結鄰翁墮戶行徑斷怪我讀書聲屋徹
茲時意緒政復佳欲往尋梅間何濶

田家卽事

東村鞭牛耕未已西村車水愁秧死可憐番人長苦辛
旱乾水溢年年事旱乾水溢天之爲天意如回一彈指
所愁郡縣無良吏不得辛勤住田里

長安行

東街女兒誰家子有名藉藉長安市不知身失不自回

顧侈金珠炫羅綺西街貧女夫何如年長不見行媒車
有時視倡獨歎息從之不可翻躊躇傷哉彼倡不自醜
顧嘲貧女爲牛後此時貧女將何言嫁與不嫁懸諸天

清水道上望隔山桃花盛開

青山深處桃花紅應有幽人住此中又疑山深入迹絕
封泥彈核如芙蓉樹成花開亦旣實實落山中還自植
年年歲歲長芳株人人錯認神仙宅

偶得牡丹之白者賦之

梅花當冬吐冰雪古今已復稱高潔春風草木爭寵光

爾乃白乎無得涅屈原放逐楚江濱山高水疾誰與鄰
商山山中四老人漢且終辭肯事秦白山茶有涪翁賦
蓮自遠公仍白傳數公已矣不可作風雨明朝埋玉樹
見負梅趨都城者甚夥作賣花行

昔人種田不種花有花只數西湖家祇今西湖屬官去
賣花迺亦遍戶戶種田年年水旱傷種花歲歲天時穰
安得家家棄花只糴米塵飈炊香勝旂旄

對菊成詠

城陰何有唯蓬翳爲乏人工欠除薙連朝陰雨早始晴

海國和 卷六 五
照眼黃花驚嘒嘒結根失所少陵悲晚何用好退之詩
那知是物有奇操要竝歲寒松柏知

風雨兼旬繼之以雪作惜梅歎

至寶橫道驚路人明珠白璧天不珍風饕雪虐雨更打
委珠碎璧同泥塵天生人材怨不以天亦何心及於爾
不然明珠白璧當愛惜忍使飄零至於此

有懷故居梅花

梅花照耀山下村舊居不返傷我魂破苔履迹誰復掃
定要風雨參成昏祇今環堵聊自存亦有獨樹背竹園

驟看疑是雲母薄細睇乃識玉體溫徘徊竟使不忍去
步繞直欲窮晡暎是中有句鬱莫吐如禪未悟叅多門
湏臾月上花且落四顧無人相與言經年取酒藉地飲
飲醉更覺山林尊

次韻斯遠折梅之作

春歸寂寞誰與傳梅開年後并臘前江南此物處處有
不論水際仍山顛爲之著句道所以檢點敗篋曾年年
七言五字古復律非獨愛渠還自憐見君新就之長篇
有如潢潦投清漣俗間比擬不足道老大更爭兒女妍

山行臘屐要上下水泛艇子思延緣豈惟病思待一洗
直恐高致成輕捐定逢縞衣露皎潔仍聽翠羽啁清圓
賦成縱使筆併秃飲雋更須瓶屢眠

對隔塹梅贈斯遠

梅開塹邊勿渠陋倚竹長年固成瘦風期喚得高人就
幾度行看還落輿是花佳處絕難摹思雖宛轉終不如
我詩有媿渭南趙君句自續東湖徐

憶山中梅送大聲瞻軍赴調

江南梅蕊臘前破憶我林園疲坐臥君行正過玉溪邊

雪後應餘欲殘朶君旣不飲何以酬詩成寄我無悠悠
得意歸來應不晚雨肥紅綻綠陰稠

初五夜再過昨逢之梅乃酒家保也

前日日莫相逢初今日日斜來看再闕然肯作時世粧
蕭然自有無人態題詩欲報故人知爲爾停驂一杯買

早起

北風動地木欲折雨旣不成當作雪黃昏側聽到雞鳴
纔有飄蕭興騷屑雖然風力猶未止雨耶雪耶知孰是
幾將被褐出門看不待足前成辟易遲明迺知雪未就

雨亦甚微風獨吼晨炊未暇詢無有亟令問訊鄰家酒

聞鳩有感

可憐鳩拙安無棲雨來逐婦晴呼歸我行願晴不願雨
憂樂殆與鳩同機長安通衢多顯位長江大扁謀崇利
我圖非利亦非名胡爲役役無寧歲

田家嘆

春欲耕時天不雨小雪不能濡旱土辛勤僅得遍鋤耨
浸種可憐溝脉縷忽然一雨催插秧東阡西陌青相望
謂茲勞逸足報補豈知亢旱愁秋陽高田已分鹵莽取

下田庶幾十八九奈何雨勢反作淫令我痛心仍疾首
我曹饑餒無足悲不死會值豐登時所嗟官吏不相察
借租日日來符移

有懷江南作田家忙

南風吹動原頭草秧老麥收蠶向了田家政用此時忙
不問兒童與翁媪五溪之俗殊江南刀耕火種不知蠶
勸農未有陶蘇句俗陋不改奚多談

田家行二首

雨聲颯颯斷復來間作隱隱兼出雷田家作苦樂不哀

拔秧插田政時哉誰知有客洞庭上船破篷疎蔽無障
何如雨笠與蓑烟相逐田伴歌田歌

江東聞田歌湖北聽山鼓鼓聲于以相疾徐歌調因之
慰勞苦東山絲竹仍攜妓風月鳴蛙勝鼓吹何如田鼓
與田歌烏烏坎坎安而和

苦雨感歎而作

不肯官嶺海頗畏瘴癘虞誰知江西山盡處亦有嵐霧
晝若晡五斗何所直千金不保軀司空城旦困刀筆尺
藉伍符愁鉞鈇吁嗟此賊蠶蟻如飛烟一炬斯無餘奈

何徵兵動州閭紛然亦復勞轉輸戍柵如櫛猶恐疎江
徼一朝成塞隅

連雨卽事

官居如穴還如巢數間編竹仍結茅淫霖更值七八月
涼冷不待秋冬交豈惟寒近感蟋蟀更爲役久悲蠨蛸
偶茲得句付排悶嬾復多言強解嘲

長江

長江滾滾來無盡順流逆挽紛成陣誰令轉側入漕河
舟似鳧鷖亦難進長江漕河唇齒間去留異態空浩歎

孰能稍激長江水，願使漕河舟亦起。

晚自白沙投宿側水

白沙漫漫風肆威，白沙道上行人稀。
征衣攝葉馬力微，問胡不歸驅以飢。
浮家洞庭書未來，腸九回兮朝暮思。
莫投道店雞已栖，一杯自慰無嫌醜。

題劉炳先兄弟怡齋

晦庵貽我書滿紙，爲說君家好兄弟。
人言是公輕許可，我謂親仁乃渠事。
客遊偶爾過君廬，中有誠齋榜怡字。
斯人許可蓋不輕，何事齋名契於季。
嗟余夙昔兩公遊，

與君常恨風馬牛，何知一見辱傾蓋。
四海兄弟寧待求，有弟有弟江南州。
尺書斷絕安與不因君，使我增離憂。
一夜夢逐滄波鷗。

三兄旣見過喜而賦此

村居不記元夕期，田蠶燈火俗異宜。
但餘林月光陸離，所期不來空賦詩。
明朝風作後日雪，祇道來期中已輟。
今朝小霽泥未乾，或報門前有車轍。
我窮政爾落荒山，蹙然忽復解我顏。
平生交舊固多矣，風味如此端亦慳。
梅雖已謝蘭可掘，有酒縱醕醅可撥。
爲予一醉莫深辭，

海國種
卷六
更要好詩書歲月

次韻畢叔文苦旱嘆

爾何不歸乎故宇卻向殊方書閔雨江東數月不得書
憶弟看雲在何許舊傳重湖北之北米賤真成等泥土
如何比歲公及私衰竭不能堪再鼓貧家一飯有併日
遠市朝炊或停午朱門但知梁可厭我輩翻嫌字難煮
晚且禾秀早向實春籩不須逾處暑胡爲旱勢復如此
坐致詩人形苦語如聞巫覡有通靈胖蠻似逢人問嫗
前朝一雨苦不難況今靡神無不舉會當勞以三日霖

綠浪黃雲看掀舞

呈李齊之文學

大機石頭雲自橫釣魚臺下潮初平側聞左蠡春水生
蛟龍改穴鼉鼉爭扁舟夜泊鄔江尾空山月出中夜起
政須傑句彈壓此乃祖詩成會泣鬼

贈唐德輿通判

憶昔中原全盛日猶推巴蜀多人物況今王氣在東南
北望中原渺蕭瑟先生隱居談典墳博士乃有垂世文
內前之行傳未了鈎黨已到白鷺羣舍人父子自知已

紅藥翻殘棠屢憩逮公四世傳以是池上鳳毛宜翾翾
胡爲一再纜別乘縱說翱翔豈其稱雞羣牛阜匪殺雞
玉水珠淵自輝映維公大父我曾祖紹聖同年蒙主恩
我今流落不足論附驥詎敢儕青雲鄱陽別去今三歲
邂逅從公寧自意幾思看句道所以筆力甚孱無好思
今辰何以爲公壽四世斯文端不朽西蜀眉山還有否

簡子崧時丞建德

石田渡口鉦鼓鳴憶同居民送君行至今是邦數廉吏
君與韋陸俱其名謂陸公能別來憶君已騰趨故人無

干韋公沈

復思漁釣豈知更作畿縣丞未免流俗輕嘲傲如君爲
學未易論淵源固自知所尊使其策足上臺省儉人吉
士當以分韜藏自是玉之美奈何有道貧賤耻漢宣且
識東海蕭吾君聰明豈不爾願君強飯力自持九十半
百古語之扁舟僅可頃刻住便風催人當語離

懷昔

君不見昔日朗州刺史賢何多考功右史名不磨當時
豈亦爲名計民自思之相與紀如何後世異於是我自
爲我民爲爾但憂潦浸務安居不慮早年當使水一時

掘鑿恐不深今日車戽乃無地常聞退之勇詞訟風伯
甫也亦欲鞭起雷公洗吳越我知二子屬風雷引喻政
合離騷轍雖然柳州禱說義甚顯神且逃難吏何免
周愚卿用荀卿氏之語以遇名齋從余求詩爲賦
世俗爭知競冶容紛紛墻穴交相從誰知亦有秉正色
奉養辛勤供織春過期不嫁心不悔偃蹇數夫終德配
君不見蘭生林下久含章得時可以弃君佩

遂初泉

并序

成父以孫子進家法釀酒既成奇甚余病其名

不足見吾故人風味爲易今名且賦建詩

荆溪溪水清無底下有亂石白齒齒東坡先生所卜居
想像神遊應不死後來高躅嗣者誰東門孫氏賢墳篋
不惟文采風流是釀酒喜客俱似之憶昨爲官在吳里
三年徵逐一日爾詩傳活法付乃兄酒有名方屬吾弟
當時釀熟曾入唇大孫絕嘆能逼人世間名賢久難辨
顧恐石室來亂真遂初自是渠家賦大孫取以名其住
我今以是謚君酒要使交情不忘故嗟予老矣百不如
有竹萬箇中藏書願從吾徒授此術歸去傭田親種秫

次韻曾季永乞筍

鄙夫食肉書生菜要是均爲口腹賣籜龍雖美亦菜流
我苦嗜之還自怪君家作屋溪上簞想見春風參短長
奈何反向寒廳乞一束未能成報章

九月晦日

經旬不飲仍廢詩不唯多故病使之黃花潦倒烏柏赤
窮邊物色分付誰空庭索索枯葉吹氣象如我茶且羸
強思把筆與摹寫安得豪壯生毛錐秋冬之間穫稻時
日脚苦翳雨脚垂鳩鳴遠樹蛙吹坎宜我病骨疲支持

同成父過章泉用前韻示之

頻年盡室依此竹意謝侏儒奉囊粟今當舍竹去作吏
竹爲嘿嘿如抱辱嗟我作吏豈俗徒雖非計然念則熟
如聞西江之水深無底可以濯纓仍濯足昔人一爲功
名誤置碑且慮變陵谷那知立名自有道未妨痛飲離
騷讀人生于世譬于味馬肝不食寧非肉弟當進德使
有聞兄亦自期無碌碌

比見愚卿于廬陵出示楊謹仲詩卷中及其弟魯
卿問其所在云携琴往嶽麓度夏今日見楊謹仲

又云其弟卓卿近過此奉其母往游洪之西山迴
途遊閣皂乃歸爾余方困于道途有嘆于其人作
詩頌到吉示愚卿及二君云

廬陵得交君弟兄楊子詩中爾魯卿問云携琴嶽麓行
歸期去日云秋清今晨復見楊子面爲言卓卿近相見
玉隆皂閣兩仙山遊以娛親趁鮮健我時聞之與楊子
嘖嘖嘆息久不已我方五斗困塵埃渠亦棲遲一邱底
魯卿卓卿真愈人枉道儒冠解誤身異日名山倘行遍
臥圖好學宗少文

李大椿伯壽見示寶劍歌答之

李子久不調慷慨多雄詞題爲寶劍篇贈我何足知我
爲讀數過因之重嗟咨尚方願賜有朱雲櫛具帶劍有
不疑雲也安能斬張禹曼倩脫或逢勝之君才固有用
我病且復衰誰能長佩矜陸離但取短鋏歌歸來

新桂林戶曹甘叔異過余於津亭留以小飲論文
縣僚有招之者遂敗此興旣夕作詩呈之

平生所聞甘叔異半日爲泊寶氣亭逢迎稍稍昏忘集
誦說矻矻文章聽其誰呼渠紅裙飲遣我負此雙玉瓶

臨流不寐待月上漫見紫翠橫山屏

讀去非有行集

山嵯峨江洶湧舟疾如飛得無恐忽來何處有竹編勢
與江山欲爭勇回思往日曾倡酬我詩島嶼縈微流鶴
鳧長短天所付追隨恐失邯鄲步

寄題山居

山居舊名需齋在
泉司主管廨中

山居爲山何所如非濤非皖非匡廬問云非山何所居
屋中主人山中徒當簷屹立幾丈餘亦有竹樹相盤紆
朝聽鶴吟暮猿呼那知門外臨通衢或聞此語謂我誣

答以君意誠守株人間有國名華胥其往初不因舟車
神游倏忽已卽塗晨雞喚覺猶蓬蘧山名無乃類此歟
胸中有山無地無朱門蓬戶何別區參前見處成工夫
季承作詩敏捷而工因成長句

我詩縱疾無多上君詩嚴甚仍匆匆君酬我唱輒媿我
野鶩欲睨天邊鴻平生交遊不乏此快筆相迫屬吾子
莫愁風雨留滯人不爾歸裝孰慰貧

王彥博愚齋

王郎立志誰能儼適遠寧爲中道止愚齋之名豈真愚

用心蓋欲師顏子聖門之徒三千人回獨好學學何事
簞飄陋巷不自貧看此力量如何爾願君勿作歲月計
有爲要之亦若是他年究竟所歸宿莫負名齋本來意

畢叔文借示郭峽州詩二軸志其所見

真行黃家元祐腳隱帙粵篇窮秘閣計其胸中所餘地
數百猶能君輩著中朝文物政須此刺史郎官謾今昨
腦脂遮眼失乘黃安得金篦今刮膜

寄青原常不輕

吾舅每談方外友吃吃醉吟長在口李侯佳句往往有

示我不輕詩數首江湖願見非一日豈有聞名不相識
路頭且向鬱孤臺卻傍釣臺深處回

戲明叔

晚食以當肉故云巧於貧我云未若子陳子挂箔爲圖
能事新剪刀不用求諸井海圖波濤供補紉我今非剪
詎可坼樹林樓閣相參陳君知入窮定何因政坐百巧
逢天嗔天之嗔人或可恕君更白取遮四鄰雖然我詩
聊戲君天生萬象誰主賓渠如愛惜不我借聽渠收卷
藏箱巾

簡贈祖高上人

黃山別久阻再披青山路遠冬未窺忽逢隱靜高監寺
不但學禪仍學詩禪機最上吾不會詩筆少親今老退
青山卧塚謫仙才功名孰愈凌敲臺

示表弟沈見可

裴公臺上送入日道鄉臺上看出雲窮居逼仄不屢到
拄杖容與能平分江湖鶴髮歎老我道路顛足嗟夫君
畫手政自歎逾度詩裏還嫌異所聞歸來客去雨亦作
此故未易輕談云

贈于革去非時為武陵尉

憶昨聞君謂君老及見知君得名早文章妙處殆風成
不作揚雄少而好西山南浦飲搜尋武陵桃源蹇探討
諸公識面爭先出學子聞風競門掃嗟我無聞不足畏
何事相逢亦傾倒論詩未易當韓豪聊復悲吟似郊島
次韻元衡病酒伏枕

陰從元日到人日四體不佳真若病每煩從事與料理
百戰不能圖一勝幾思屏去不復親茗椀薰爐事閒靜
鳴鳩聒聒殊未已門外雨狂風亦橫此時但覺濁醪賢

少日漫知黃卷聖

屢遺公擇書且寄以詩皆未得報成父弟書云公

擇欲過予再寄

與君相從不知樂別去懸知頓牢落一旬兩詩三附書
底事來因向人邈知君去住良關意養節忍窮非失計
如君豈得終布衣會有高名耀斯世我居正在千山底
落葉填門吹不起薄醪縱有不敢醉留待君來相料理
惠然過我今其時籬下菊香驚早衰南山石老有梅樹
要君分韻共哦詩

公擇失期未至再督以詩

作詩有病誰與說讀書有疑誰與決思君祇在百里間
底事相望若胡越阿連報君有來期候君未至趣以詩
想因故人意戀戀故作去魯行遲遲

醉呈亦韓

人言唯酒可忘憂我今醉乃生百感又言和氣如三春
我迺凄凉似秋慘層冰積雪春接冬安得陽鳥出幽坎
紛然桃李吾不關要與晴窗事鉛槧

呈審知并簡伯元

溪流渴雨今幾日夜夜月明翻我室江西回首安在哉
南北故憐無定食君居未盡喬木西舊識鄰牆解作詩
如聞過雨必更僕飯寒塵禿忘其飢我思從之不可得
書疏空雲間何濶秋風吹我逐轉蓬何自翩然墮君側
君詩比昔更大好誰謂文章技非道暗中摸索未易窺
衆裏卒逢分眊瞭我昔少小嗜讀書老類賈胡空識珠
潛珍懷寶衣藍縷見之每輒驚成法鄭君况是余所長
君得結交真邁往如我何取亦與遊聽呼殷兄喚張丈
兩君抱才終有爲豐年未厭甘雨遲我無良田蒔嘉穀

取譬但可同蹲鴟

比作詩從成父索不老泉并簡子造昆仲今日成

父送酒與子進子肅子儀詩俱來復次原韻

閒居顧合親杯勺醉後無人怪疎畧所嗟故舊不可同
往往茅齋成獨酌兒曹癡疾故我問問我嗜此有何樂
那知是鄉疆場寬南北東西無住著自應祗覓睡昏昏
不肯留計綬若若浮生倏忽幾許事今是何必還須昨
粗能適意效陶阮底用策勲追衛霍比年多病苦羸劣
暇日關心惟裏藥誓從歡伯重尋盟身雖欲前心乃卻

今晨風日亦佳哉冬暖如春木陰薄潛魚撥刺鳥緩鳴
得處與我端相各應門走報白衣至麾去謂爾寧善詭
山陰應接已不暇安得此君仍大嚼須臾負擔置我側
跌坐方穩爲驚作問之遣向阿連家季也不爽千金諾
竟徵西園昔人例尚病無花來自洛快令汲井洗觥觴
小摘畦蔬失穿屨俱來數紙定誰氏疑枉續帖摹秘閣
抽簪擊鉢一誦之郊居賦謝東陽約蒼然暮色且欲合
檐光小占明窓拓一時頓有未足道真是曹劉暗中索
預愁取將下雷電破篋深藏更牢鑰出門仰見天雨霜
良夜初沈雲四幕

代書寄候毛伯明李叔器康叔臨張王臣

巴陵洞庭在何處我昨移官向其所士所得者毛李康
兼之舊識祁之張毛公學問本伊洛康李從之亦不惡
皆能脫去科舉累和與探求聖賢事張侯英爽固絕人
亦復降志相友親誰云巴陵洞庭側有此四士寧易得
別來書疏猶數通辰溪隸與巴陵同張侯再把蒸湘酒
別不後聞安與否遙知歲晚巾屨從當亦念我窮山中
嘗疑昔人重離別生不相逢死何別偶逢鄂渚行人去

嬾復作書題此句巴陵渺渺若箇邊何時重泛洞庭船

次韻斯遠夜歸自溪南之作

憶昔曾聞南渡初里人最賞白社徐君如竹林有雋子
我類犬子晞相如君子何翅一頭出李杜齊名真是溢
唱酬縱許並流傳安有隋珠混燕石我今鬢髮衰且殘
君乃春秋富未闕後人縱使加譏彈韓也固豪郊自寒
明叔用大字韻作詩見寄復用韻作七言答之

人皆言君酒腸寬我亦畏君詩膽大有時長吸百川空
放意獨掃千軍敗不堪悠悠射馬耳頗願渺渺騎鯨背

問君何如差樂否願窄江湖低華泰

叔文再用韻賦詩亦復用韻答叔文兼呈伯玉昆
仲

杜陵心喜歸茅宇無復長安歎今雨事雖聊向朱阮論
身益自與稷契許胡爲流落不稱意長鋏來往遍南土
我嘗細把遺詩讀大半悲傷聞戰鼓徒空至德至大歷
田車竟絕維庚千區區清醪與肥羊何似松根茯苓煮
是翁獨破念吾廬太息明光誰避暑詩窮如是僅得名
欲作詩人寧易語要呼同志共討論客裏那知酒家姬

便從甕側覓茂世誰復尊中似文舉共將峻韻搜掘奇
要逼蛟龍起飛舞

王伯玉兄弟皆用叔文韻作詩見示答之

春芳凋兮瘖杜宇留得鳴鳩呼渴雨誰能使我病斯愈
矻矻深思誦詩許朝來剥喙有扣戶亟起褰裙犯塵土
三王詩就俱送與律應節疏如會鼓我家與君同鄭圃
流落殊方繇丙午豈維交友歎雲翻亦有弟兄悲豆羹
羨君聚首共文書憐我離形屢寒暑江南豐歉未可知
安得書來相告語已過有力健如犢莫待無鬚行似嫗

我歸當事力田科君行寧後公車舉會當過我南山南
門有修簞風屢舞

寄答晁百谷元歸

嗟我與君爲近親向來未識但有聞維夏臨川省伯父
時君束書寄荒村豈知邂逅宜春郡皎如玉樹相輝映
品題舊熟大參文諸公所作皆傳信探懷贈我一紙詩
功名慷慨真男兒我衰怕作此硬語君言水漲方東之
外家自有文章種國朝名家居伯仲只今人物未厭多
屬君勉矣加研磨

贈彈琴李晞尹

臨川郡古多奇迹嚴黎已老裘父沒江山縱是詩得摹
我我洋洋亦其物謫仙幾世之雲仍平生嗜渠如嗜文
光風霽月胸次有消北江東腳底頻忽來過我今幾日
擬欲贈行空四壁臨分漫與一篇詩箏笛紛紛敢謂知

簡謝丈

有身那識禁酒國何乃飄零墮其域兒曹強欲覓市酤
頗畏飲灰仍飲濕重令尋菊菊未芳飛蓬野蔓交加長
是知此物貴晚節無意與俗充杯觴生平浪說愛重九

今年無菊還無酒要携藜杖作登臨病不如人空竚首
使君聞說同王弘半道要公絕送迎要見一時賓與主
籃輿侍坐俱門生

既浴于乾明庵暄負久之詩示住菴

天公於人元不負書生何用深追咎無衣還可卒歲無
我有大裘聽汝覆吾家縛屋依山址晏齋之前僅盈咫
霜颯捲席不畏渠羲馭停車吾事已有時携書喚兒曹
坐來和氣生髮毛眼眇豈待金篦刮背痒不借姑麻搔
今年誰令落湖尾塞向瑾戶殊未止移床也擬傍晨光

蓬勃如烟紛欲眯今我懷抱不自聊歸燕生薪翻繡袍
人間萬事固絕望天賜一暖誰相要茲晨歸悶忽念浴
試覓僧廬渡喬木道人見客如昔遊爲煮清泉注萬斛
須臾一洗垢且空漸覺表裏俱冲融清虛日來滓穢去
吾貌可瘠神當豐起尋冠服風動腋卻向茅檐親野日
恍然墮我晏齋前鳥語不聞山四寂道人領客殊忘倦
茗盃薰爐共閒燕爲言炙背頗樂否此味可須天子獻

臣馬啓泰恭校

